



# Tir Yimyim

www.tirymyim.in

Regd. No. RNI. NAGAAO/2004/13113. Postal-NE/RN-717.

e-mail : tirymyim@gmail.com

TAPAK 8

Yangia anidakangma :

f Tir Yimyim

Instagram tirymyim@aolima

YouTube tir yimyim

TAPAK 7



Taoba Iran tir Abolhassan Banisadr süogo



EAM Jaishankar-i linük asem semdangtsü

VOL. XIX NO. 3 (ADOK 3) DIMAPUR

AMUNGNÜ (SUNDAY) MONGPUTENI (OCTOBER) 10, 2021

₹ 5.00

## Nagaland nung telecom sector indang khurettem MoS den lemsatep

**Dimapur, October 9, 2021 (TYO):** October 9, 2021 nü Minister of State for Communication, Government of India, Devusinh Chauhan-i Department of Telecommunication & Posts state ktdangsurtem den senden ka amen.

Ministry of Communication ya ministry tejentiba aser ano technology tasentem adokba den medemdangra ministry tasentiba lir, ta tanü Union Minister Chauhan-isa shi.

Linük nung kinük ajaklen connectivity tongra democracy-i tatembangtiba tesem atongba ama asütsü, ta paisa ashi.

Telecommunication ya kanga dang tongtipang aser Covid wara ajanga wadang ajak nung kongshi aser wadang ajaki online maparen tenzüksüsa aküm, ta Chauhan-isa ashi.

India anüdoklentip tsütsü telecommunication services nung tayongzükbatem ajurur aser itemji kottetsü atema sorkari technology tasentem bushiteper. Teledensity tsütsü Nagaland jenjang tajung nung lir, ta paisa ashi.

## COVID-19 Nagaland: 13 dak putet, 34 taneptsü angu & 2 asü

**Kohima, October 9, 2021 (TYO):** Nagaland nung Honibarnü nisung 31 dak COVID-19 putet aser parnok züngsema nisung ajak agi 31,441 kümogo.

"Tesüiba ghonda 24 tsüngda nisung 31 dak COVID putet. Parnokji Dimapur nung 25, Kohima o Phek nung anana (2) aser Kiphire o Mokochung nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-isa shi.

"Kasa mapang COVID-19 puteta alir nisung 35 taneptsü angu. Parnokji Dimapur nung 22, Phek nung 6, Kohima nung 4, Mokochung nung 2 aser Kiphire nung 1 lir" ta paisa ashi.

Nisung 31,441 rongnungji 29,480 taneptsü nguogo aser

## NE nung tarulen mesayuba sen crore 250 putet

**Guwahati, October 9, 2021 (Agencies):** Northeast aser West Bengal nung cement manufacturing aser railway contracts dak sendakba mapa inyaker telok ana ket nung tarulen mesayuba sen crore 250 aliba putetogo.

October 5 aser 6 anogotem Income Tax Department ktdangsurtemi Kolkata, Guwahati, Rangia, Shillong aser Patna nung mita aodang senji apu.

"Iba mapang yimjak nung memetdaksüba Rs 250 crore aliba putet. Ano, sen tarulen mesayuba Rs 51 lakh tashi au" ta Central Board of Direct Taxes (CBDT)-i ashi.

"Telecom sector tajungba akümsü atema senotsü tebilemsü kecha mali aser telecommunication network connectivity tajungba akümsü atema sen peria dang agütsütsü" ta Union Minister Chauhan-isa metetdaksü.

Union Minister aikati Nagaland semdangba ajanga Centre-i dang masü saka state tem den asüngdangtepba sülen ang policy yangluba sayur, ta IT&C, NRE and S&T Advisor, Mmholnumo Kikon-isa ashi.

Sorkar ktdangsubaren, terenlok mapa aser security tsütsü telecom maparen kanga tongtipang kümogo aser iba jagi Nagaland nung bandwidth talila nüngdaker, ta paisa ashi.

Covid wara ajanga lockdown alidang nübertemi online ajanga mapa tuluba inyaksü tenzüker aser iba jagi bandwidth aser connectivity talila nüngdaker, ta Advisor Mmholnumo-isa Union Minister dang ashi.

Iba sentong nung mendenji Principal Secretary to Chief Minister, IT&C and Power, K D Vizo liasü.

ibaji 93.77% lir, ta paisa shisem. Tang nisung 277 anepaludar saka parnok rongnung nisung 207 dakbo shirangba yimya kecha mali, ta Dr Kikon-isa ashi.

Honibarnü Dimapur nung COVID-19 puteta alir nisung 2 asü aser tena züngsema tasür ajak agi nisung 671 kümogo, saka nisung 15 dakbo tanga tashidak liasü, ta paisa metetdaksü.

Hokolbar tashi nung nisung 695,743 nem COVID-19 vaccine indang dose 11,02,934 agütsüogo, ta State Immunization Officer, Dr Ritu Thurr-isa ashi.

"Vaccine agirtem rongnung frontline workers 60,943, healthcare workers 15,997, arishi küm 45 ser temapur 199,536 aser arishi küm 18 nungi 44 tsüngda alir 419,267 lir" ta paisa metetdaksü.

Iba ken o dak sendakba nung bank lockers 9 tashi noktangogo, ta parnokisa ashi.

Telok kati kakat nung mezülüoki sen angu aser tiyazü nung sen endokba sayur. Parnoki company tiyazütem ajanga senji amshi, ta CBDT-isa metetdaksü.

Iba telok jagi sen aputsürtemji lisopurtem ta tiyazü sayua sen Rs 38 crore tashi amshi, ta parnokisa ashi.

Tanabuba telok jagi Assam, Mizoram aser Northeast kübok tangalen railway contracts inyaker.

"Ali aser rongsen dak sendakba sale deeds aika nguogo aser itemji Rs 110 crore tema shi indang asütsü" ta CBDT-isa ashi.

## Diphupar Aor kaketshirtemi Covid nungi jenbua alitsü ayimoktsür "Covid vaccine menungnangi agitsüla : Minister Tongpang Ozüküm



October 9, 2021 nü PWD (Housing & Mechanical) Minister, Wb. Tongpang Ozüküm-i Ao Students Union Diphupar (ASUD)-i indang Face Mask campaign tenzüksüdang agiba noksa angur. (Dimapur, October 9)

**Dimapur, October 9, 2021 (TYO):** Honibarnü Ao Students Union Diphupar (ASUD)-i facemask enokba ajanga Covid wara nungi jenbua alitsü aser Covid dak sendakba inyakyim benshitsu tayongzüka agüja sentong tajung ka ayongzüka agiogo.

Iba sentong ya Golden Jubilee Hall, Ao Baptist Arogo Diphupar nung ayongzüka agi aser PWD (Housing & Mechanical) Minister, Wb. Tongpang Ozüküm-i alakteta jaoker ka ama shilem agia liasü.

Tanü Minister Tongpang-i ASUD indang facemask campaign tenzüksü aser iba sülen ASUD züngsemtemi Dimapur kübok 5th Mile, NRL petrol pump Purana Bazaar, City Tower aser Nyamo Lotha road nung traffic point ana nung facemask 4000 den külemi car stickers aser pledge cards lema agütsü.

"1992 küm ASUD tentetba sülen nungi mapa tajung aika inyaka arur" ta Minister Tongpang-i sentong nung o jembidang ashi.

"Tanü nenoki face mask campaign agiba ajanga nübertem ajangzüka dang masü saka face mask enoktsüba indang osang prokshitsu" ta pai ashi.

Covid wara ajanga wadang aika nung takok bentsür aruogo aser talisa asenoki rongsenkettsüng tsütsü kanga akoksaogo, ta paisa shisem.

"Covid mezüng wara nung Naga nunger kanga dang kümdanga liasü aser süoki ia bilem, iba jagi asenok dak tuluka mekongshii süi. Ajisüaka, Covid tanabuba wara nung asenok tera zübazülema liasü aser iba jagi nisung aika taküm samatsüsa tia ka ajuruogo" ta Minister Tongpang-i ashi.

"Asenoki tanurtembo tasüngdangba kecha melii mesüra marentaki dang vaccine agidaksür saka asenok vaccine agitsübabo memolunger. Iba nung tebilemdangtsü ka lir" ta paisa ashi.

"COVID wara nungi jenbua alitsü atema asenoki vaccine menungnangi agitsüla. Medical scientist temia Covid vaccine

nung lendong kecha mali ta kulitem agütsüogo anungji asenoki vaccine agitsüla" ta paisa ayongzüker.

"Naga nungertemi Indian Constitution nung Arrla 12 aser 21 nung ajemdaker vaccine magitsü temeten aliba indang jembir. Külen, social media nung olulu aser tamagitsü osangtem prokshir. Ajisüaka, Arrla 269 aser 270 ajanga asenoki jembiba aser prokshiba ajanga nisung kar taküm lendongi aitsüsa ajurura temerenshi alitsü indang lateta lir. Anungji asenoki kanga dang kümdanga Covid dak sendakba osangtem proktsüla" ta Tongpang-i ashi.

Minister Tongpang-isa Aortem asoshi tebilemsü khuret kar lemsatepdang rongsenkettsüng aser shisaluyimba nung temolung agütsütsü ayongzüker.

"Aortem yimsoshitsüba mapang ka tongogo" ta pai ashi. Paisa lanurtem dang pei yimtsüng mamatsü aser teti meimsü tayongzüka agütsü.

(Maneni tapak 2 nung...)

## Meluri sub-division nung jang aika asüba sülen tenokdangba agütsür

**Dimapur, October 9, 2021 (TYO):** Phek district kübok Meluri sub-division nung jang bener aruba, shi atema tepseta ayokba aser belenba ajak noktangogo.

Tawa Meluri sub-division nung jang aika tashidak ka ajanga asüba sülen joint verification team-i bushisüngdangba osang agütsüba nung ajemdaker Phek district administration-i iba tenokdangba agütsü.

Joint verification team-i October 7-9 tashi Kanjang, Reguri aser Akhen yimtsüngtem tonga oa jang asüba

bushisüngdanga liasü.

Iba tashidak ajanga jang 204 tashi asüba bushitetogo. Reguri yim nung jang 112, Kanjang yim nung 82 aser Akhen yim nung 10 asü. Ano jang aika mangu bushiteper aser iba khuret yagi kibong 106 dak kongshio.

Jang asüba tashidakji Haemorrhagic Septicemia ta medical reports ajanga ashir.

Joint verification team-isa yim balala nung nisungtem den ajurutepa sensaksemogo aser iba mapang parnoki rongsenkettsüng tsütsü takoksa tulu anguba lemsatep.

Jang shi achiba dang masü saka aluyimba mapa nung amshir ta yimdaklirtemi ashi.

Nagaland State Disaster Management Authority (NSDMA) assistant manager Jonji Odyuo-i aniba teloki jang asüba bushisüngdanga liasü.

Iba telok nung Meluri veterinary assistant surgeon Dr Shipatu Thupitor, Lephori extra assistant commissioner C Tsalirnse Sangtam, Phek District Disaster Management Authority nodal officer David Thupitor aser NSDMA consultant Kati Jamir nunger dena lir.

### Kitsubozou Panchayat-i lokti metsümeshidak lapoktsüogo



**Kohima, Mongputeni/ October 9 (TYO):** Moapu nung metsümeshidak nokdangtsü atema Swachh Bharat Mission (2019-20) den peta Kohima Municipal Council (KMC) office secretary Zakiekhoto Kiso-i tanü Kitsubozou colony, Ward No. 5, Kohima kübok Sector-3 nung alirtem atema kanga dang nüngdaka aliba metsümeshidak ka semzüksüogo.

Sentong nung o jembiba mapang Kiso-i, 2015 küm March 24 nü SBM amenokba sülen tang tashi nung KMC-i kibong 3887 shi nung metsümeshidak aser lokti metsümeshidak 104 yanglutsüogo, ta ashi.

Kiyong aikati lokti metsümeshidak yanglutsü atema mepeshia asüngdangogo, ajisüaka ali peria maliba ajanga parnok temepeshiba mataloktsütet, ta pai ashi.

Paisa, KIsubozou Sector-3 nung lokti metsümeshidak ya Kohima municipality kübok metsümeshidak rongnung tajungtiba ka ta shia pa kanga pelaba lemsatet.

SBM-I ya September 30 nü tembangogo aser kasa mapang nung Ato Kilonser Narendra Modi-i tanabuba shilem October 2 nü tenzüksüogo, ta pai metetdaksü.

Maneni pai, KMC & Smart City-i kiyong balala nung tetsüing lenmang yanglutsü atema

asadangtsü aser household census-a agitsü, ta ashi. Iba dak sendakba nung pai kiyong lenirtem dang teka amteper inyaksü ayongzük. Kiyong nung kibong kwi ali aji jangjaba ajanga terenlok atema project balala benoktetsü, ta pai ashi.

Kiso-isa, jila nung alirtem libaliro ajungkettsüsü atema Smart City aser KMC-i maparen balala benoka inyakba indang metetdaksü.

Kasa mapang nung Kitsubozou Panchayat Chairman Vimhalie Pienyu-i, par kiyong nung lokti metsümeshidak ka yanglutsüsü atema mepeshiba KMC-i agizükba atema kanga pelaba lemsatet.

Iba metsümeshidak ya SBM 2019-20 kübok KMC aser nüburtemi senotsü teyari agüja 2021 küm March ita yanglu tenzüka aser October 7 nü tembanga yanglu, ta ashi. Iba ajanga kibong 60 ajanzüksü, ta paisa ashi. Pai iba metsümeshidak amshiba kibongtem dang lokti meyong metsümeshidak ya kanga junga anepalutsü mepeshia metetdaksü. Sentong nung Pastor Vikhotsolie Üsou-i bendanga agütsü sarasadem agi.

### State sorkari committee ka tentettsüogo

**Dimapur, Mongputeni/ October 9 (TYO):** Districts tasen tentettsüba densema administrative headquarters tasen amenoktsü aser ajungkettsü atema ken o balala benokba asadangtsü asoshi Committee ka tentettsüogo. Iba committee yagi districts/sub-divisions tsüngtong oa asadangtsü aser stakeholders balala den sensak asemtsü.

*Committee züngsemtem yamai alitsü:*

1. Rovilatuo Mor, IAS, Commissioner, Nagaland Chairman

2. W. Honje Konyak, Commissioner & Secretary, H&TE Member
3. Kevekha Kevin Zehol, Secretary W&H Member
4. L. Jamithung Lotha, Addl Secretary, Border Affairs Member
5. Hito Sema, Joint Secretary, YR&S Member

Committee yagi osang sangdongba sülen ita ka ser tesadang tsüngda report aser tinyaksü maparentem asadangtsü atema Home Department nem agütsüsü.

### Security Forces-i telungpur ana apu



**Kohima, Mongputeni/ October 9 (Agencies):** Police den longjemer meita aoba mapang Security Forces-i Kiphire jila nung October 7 nü NikiSumi teloknungi züngsemka aser FGN nungi züngsem ka ta puogo.

Osang tejangja angazükba sülen State police aser Security Forces na longjemer meita aoba mapang Kiphire jila nung

telungpur ana apu aser tena ket nungi Motor bike ka, point 38 Pistol ka den magazine aser point 38 injang asem nguteta liasü.

Ken o maneni bushisüngdangtsü atema aija alisang ana ya Kiphire Police Station, nem bendanga agütsüogo, ta PRO (Def) Kohima, Lt Col Sumit K Sharma-i sangdong ka ajanga metetdaksü.

### Mon nung Oxygen Generation Plant semzüksüogo



October 7, 2021 nü Mon DC, Thavaseelan K. IAS ajanga District Hospital Mon nung 400 Litre Per Minute (LPM) Oxygen Generation Plant (400 LPM) lapoktsüba sülen tangokba noksa nung angur.

**Dimapur, Mongputeni/ October 9 (TYO):** October 7 nü 400 Litre Per Minute (LPM) Oxygen Generation Plant ka District Hospital Mon nung Thavaseelan K. IAS. Deputy Commissioner, Mon-i semzüksüogo. Iba sentong nung Superintendent of Police, Chief Medical Officer, Medical Superintendent (I/C), Mon

kübok Medical Officer tem aser District Hospital nungi Staff temi shilem agia liasü.

District nung Oxygen Supply ajungkettsü atema iba Oxygen Generation Plant ya District Administration tawabangba kübok CSR nung shilem ka ama ACT Grants-i tenla agüja liasü.

Iba plant amenokba sülen District Hospital nung Oxygen

Capacity ji 900 LPM (PM Cares Oxygen Plant nung 500 LPM densema) asütsü.

Sentong nung o jembiba mapang Deputy Commissioner-i, iba mapa tajung atema ACT Grants Team nem tenüngsang agütsü aser COVID -19 wara süshiba sülena maneni teyari agütsüsü mepeshia metetdaksü.

### Meluri nung nashi chang asüba asadang

**Dimapur, Mongputeni/ October 9 (TYO):** Assistant Manager, NSDMA, Jonji Odyuo-i anir Joint Verification Team kübok Veterinary Assistant Surgeon, Meluri, Dr. Shipatu Thupitor; Extra Assistant Commissioner, Lephori, C. Tsalirne Sangtam; Nodal Officer, DDMA-Phek, David Thupitor; Consultant, NSDMA, Kati Jamir nungeri October 7 nungi 9 tashi Kanjang, Reguri aser Akhen yimtsüing tonga orr nashi chang asüba asadangogo.

Ken o asadangba sülen Reguri yimtsüing nung chang 82 aser Akhen yimtsüing nung chang 10 asüba ngutetogo aser iba den ano chang aika samara aliba ngutetogo. Shiruru asüba ajanga aluyimer kibong 106 akoksaogo.

Medical tsütsü ken o asadangba sülen chang ya

Haemorrhagic Septicemia agi asü ta ngutetogo. Iba tashidak ya bacterial disease ka lir aser iba ajanga nashi chang dak kongshir.

Tashidak menatepa aoba nokdangtsü atema District Administration-i, nashi chang tanga len nungi bener aruba nokdangogo aser iba den shi aleptsü memelar aser Sub-Division kübok chang belenshiperaba mapang telatet ka makai nokdangogo.

Iba team yagisa yimtsüing asemprongla nungi züngsemtem den sensaksemogo aser iba ajanga yimdaklirtem tebilemstü tali tajungba angatetogo. Iba ajungben wara ajanga yimtsü nung kibongtem aika rongsenketzüng nung takoksa ajuruogo, kechiyong shirurutem ya achitsüba atema dang masü saka aluyimba nung parnok atema kanga tongtibang lir.

### PDMGDVA-i "NO REPLY, NO WORK" longkak aiba sentong agin

**Dimapur, Mongputeni/ October 9 (TYO):** October 8 nü DC Office Chamber nung Deputy Commissioner, Phek, Razouvolie Dozo, NCS lenisüba nung Phek District Maytas-Gayatri Victim Association (PDMGDVA) aser Chakhesang Public Organisation den senden ka menogo.

DC-i, Phek District Maytas-Gayatri Victim Association tebilemstü bentetsüsü atema state sorkari kanga süoki ia agiba senden nung densema alirtem nem metetdaksü. Paisa, Minister, Planning &

Coordination, Land Revenue, Government of Nagaland-i lokti ajanzüksü mechi PDMGDVA dang "No Reply, No Work" longkak aiba sentong agintsü mepeshia asüngdanba metetdaksü. Kasa mapang nung Minister-i association dang tanga district tem den külemi iba ken o takaratiba nung kanga tongtibangsa agitsü tenanzükba agütsüogo, kechiyong iba ken o ya ajak khuret lir, ta paisa ashi.

Kasa mapang nung Chakhesang Public Organization-ia PDMGDVA dang longkak aiba sentong

agintsü mepeshi asüngdangba den Chakhesang Public Organisation-i PDMGDVA takok tashi nongita yaritsü tenanzükba agütsü, kechiyong iba ken o nung CPO-a petitioner ka lir.

Minister, Planning & Coordination, Land Revenue, Government of Nagaland temepeshiba dak ajemdaker Chakhesang Public Organization matsüngda Phek District Maytas-Gayatri Victim Association-i "No Reply, No Work" longkak aiba sentong agintsü mulung agizükogo.

### Diphupar Aor kaketshirtemi... (TAPAK 1 NUNGI...)

Iba sentong nung mendenji Kr. Arenla Imsong liasü, ABAD Pastor Wb. M. Lipok Jamir-i temoatsü meshia sarasadem, Diphupar Ao Senso Telongjem Tir T. Maong Aier-i tajungshi o jembiba aser Asso. Pastor Youth Wb. Talimoa-i tenüngsang agüja tembang.

Sentong nungsa ASUD Tir Wb. Imnayanger Jamir-i tesentepertem pelaa agizük aser Wb. Moasunep Lemtur-i anküp tepela o jembiba.

ASUD-i tanep Cycling aser Eating tetoktepbatem ayongzükba agi aser sentong nung takok angurtem nem sempettem lema

agütsü.

**Eating Competition (Women's)**

- 1st - Sentiyanla
- 2nd - Bendangtula

**Eating Competition (Men's)**

- 1st - Yelobemo
- 2nd - Mongtensa
- 3rd - Nyekha

**Cycling (Women's)**

- 1st - Reshma Singh
- 2nd - Wongtonglo Ovung

**Cycling (Men's)**

- 1st - Kevetozo
- 2nd - Kezevilie
- 3rd - Tekevitso Therie

**Youngest Participants (13 years):** Visakoteo & Samanir Walling

# Venkaiah Naidu-i Arunachal semdang



**Itanagar, October 9, 2021 (Agencies):** India Tatong Tir M Venkaiah Naidu-i anogo asemnü Arunachal Pradesh semdangtsü aruogo.

Honibarnü Tatong Tir Naidu-i Arunachal indang State Legislative Assembly 'special' session nung o jembibi.

Tanü Indian Air Force tayimtsü ka nung Naidu mener arur Raj Bhavan helipad nung anenzük. Idangji Governor Brig (Retd) Dr B D Mishra, Chief Minister Pema Khandu, Deputy

Chief Minister Chowna Mein, Speaker Pasang Dorjee Sona aser tangartemi pa pelaa agizük.

Iba sülen Governor, Chief Minister aser tangartemi meiner Naidu-i Jawaharlal Nehru State Museum semdang.

Idakji pai Arunachal nung sobaliba balala indang nungo aser nungshilungtem reprang.

Naidu-i special Assembly session nung jembiba dang masü saka Assembly kaketnang, Dorjee Khandu

Auditorium aser Assembly complex nung paper recycling unit lapoktsüsü.

Tanü pai Raj Bhawan Itanagar nung writers, educators, social workers, entrepreneurs aser mountaineers den ajurutepa sensaksema liasü.

Tatong Tir Venkaiah Naidu ama tongtipang lennir kati semdangba atema Itanagar Municipal Corporation Mayor, Tame Phassang-ia pelaba osang metetdaksü.

# Kibong 1,000 nem ali acre 77,000 atsünga magidaksütsü: CM Sarma

**Guwahati, October 9, 2021 (Agencies):** Assam Chief Minister Himanta Biswa Sarma-i Darrang district kübok Garukhuti nung nisungtem meindokba maparen tepo küma jembibogo.

Ozü sorkari kibong 1,000 nem ali acre 77,000 tashi atsünga magidaksütsü, ta pai ashi.

"Ali tasazükji acre 77,000 lir aser iba jagi onoki parnok meindoker. Kibong 1,000 nem acre 77,000 atsünga magidaksütsü. Ali ya jungjunga alemtsüla" ta Sarma-i ashi.

"Asenek land policy ajanga

nisung shingaia ali acre 2 tema ayutsü memelar" ta paisa shisem.

"Ali malir nem asenoki ali agütsüogo. Asenoki sorkar mapatongtem inyaksüla. Anungji VGR (Village Grazing Reserve), PGR (Professional Grazing Reserve) atsünga agirtem meindoksüsa akümstü. Parnoki asen forest ali atsünga agira meindoktsü" ta CMSarma-isa metetdaksü.

Ali atsünga agirtem meindokba ya maneni inyakba mapa ka lir saka tatalokba ka ajanga iba ya linük ajunga meteta aküm. Assamese lisopurtemia sorkar li atsünga

agitsü merangba meindokogo, ta paisa ashi.

"Iba nung kin nung ajemdaker inyakba kecha mali" ta paisa shisem.

"BJP-i 'Miya' Muslim (Bengali oshi jembiba Muslim) nunger indang votes menügdaker. Ni Miya maginür, onok külemi alir sak ni parnok dangi votes atema maoyer aser parnokia kü dangi marur" ta Sarma-isa metetdaksü.

Taoba ita Darang district kübok Dholpur nung ali atsünga agirtem meindokdang police-i nisung ana kaset aser 12 yirutsü.

# Congress-i Assam by-election atema star campaigners metetdaksür



**Guwahati, October 9, 2021 (Agencies):** October 30, 2021 nü Assam Assembly by-election atema Indian National Congress-i star campaigners tenüng metetdaksüogo.

Representation of People Act 1951 nung Section 77 (1) nung lateta aliba ama Congress-i Section 77 (1) by-election atema nübo ayimtsü.

Assam nung constituency 5 nung by-election agitsü. Itemji

Gossaigaon, Tamulpur, Bhabanipur, Mariani aser Thowra lir.

Taküm küm tetenzüklen assembly election agidang Congress-i Thowra aser Mariani assembly mendentem nung takok angu saka MLA anaprongi party toktsür BJP nung aden.

Assam by-election atema star campaigners: Jitendra Singh, Bhupen

Kumar Borah, Debabrata Saikia, Vikas Upadhyay, Prithviraj Sathe, Rana Goswami, Kamalakshya Dey Purksyastha, Jakir Hussain Sikdar, Paban Singh Ghatowar, Ripun Bora, Pradyut Bordoloi, Gaurav Gogoi, Abdul Khaleque, Rakibul Hussain, Basanta Das, Siddique Ahmed, Durga Bhumi, Manoj Dhanowar, Garjan Musahary & Bisti Basumatary.

**Piles Anepaluba** - Kabiraj dang alakteta pelaba metetdaksür. Piles, Fistullah, Gastric, Sinus aser Tonsil-Althjma agi ni kangshia liasü aser Rectum nungi azü alu dang mapang talangka item timtem nungi junga taneptsü mangu. Ajisüaka, tang Kabiraj H. Umar Chesam contact no. 8416087414 / 6909717178 National awarded H. Umar Chesam Address: Burma Camp 2nd Police point opp. tetuyuba nung anidaka surgery kecha magii (non-surgical) anepalur anogo ishika tsüngda ni taneptsü ngua liasü aser iba sülen tanü tashi kü temang nung timtem kecha mali. Time: 9 AM - 5 PM Yours sincerely - Rangma, Add: Wokha



# Dibrugarh Police-i ozüngi memelaba Aadhar centre ka makdok

**Dibrugarh, October 9, 2021 (Agencies):** Dibrugarh police-i Dibrujan tesem nung ozüngi memelaba Aadhar card enrolment centre ka makdokogo.

Khalil Rahman ta ser nisung kati Aadhar enrolment centre ya lapoker maparen inyaka aru.

Iba centre nung Aadhaar card ka yanglutsü atema Rs 350-Rs 450 tashi agi.

Tesüiba ita ana tashi iba Centre ya aonung 6:00 ako nungi 10:00 ako tashi anogoshi lapoker mapa inyaka aru ta osang angazük.

Parnoki nisungtem dang Aadhaar enrolment atema sen jelia meshia saka tang tashi nung enrolment ka danga mesütsü lir.

Dibrugarh Police tsüngdang ken o tem benokba sülen police telok kati iba centre tonga ao saka idakji inyakerem jena ao.

Assistant commissioner Jyotikona Chetia-ia iba tesem tonga orr osang metetpelaogo.

"Police tsüngdang ken o benokba sülen onoki bushisüngdang tenzük. District administration-i FIR ka benokogo. Onoki aibelenertem merenshitsu" ta Assistant Commissioner, Dibrugarh, Jyotikona Chetia-i ashi.

Dibrugarh nung ozüngi memeleba Aadhar centre aika lapoka lir ta osang angazük.

Dibrugarh kübok Goenka market nung Aadhaar centre kati Aadhaar card ka yanglutsü atema Rs 400-Rs 450 meshir.

# Mizoram nung Assam Rifles-i cigarettes aser kozüjang aika apu



**Aizawl, October 9, 2021 (Agencies):** Mizoram kübok Champhai district nung Assam Rifles sepaitemi tatalokba balala nung ozüngi memelaba foreign cigarettes aser kozüjang aika apu.

23 Sector Assam Rifles indang Serchhip Battalion sepaitemi ozüng alema shibelenba maparen inyakdang cigarettes aser kozüjang apu.

Chhungte nung sepaitemi foreign-origin cigarettes case 14 apu, ta HQ IGAR (EAST)-i sangdong ka nung metetdaksü.

Sepaitemi apuba cigarettes indang jenjangji Rs 19,99,400 shi indang liasü ta asadangtetogo.

"Osang tejangja ka angazükba nung ajemdaker Assam Rifles aser Customs Department, Champhai külem telok kati iba mapa inyak" ta AR-isa ashi.

Ano, Serchhip Battalion nungi sepaitemi Melbuk-Champhai Road nung kozüjang bosta 180 apu.

Parnoki apuba kozüjang indang jenjangji Rs 34,34,400 indang liasü ta asadangtetogo.

# Nagaon Central aser Special Jail nung HIV putet

**Nagaon, October 9, 2021 (Agencies):** Nagaon Central Jail aser Special Jail nung puoka alir nisung 85 dak Human Immunodeficiency Virus (HIV) aliba putetogo.

HIV putetba nisung 85 rongnung special jail nungi 45 aser central jail nungi 40 lir, ta Nagaon BP Civil Hospital Superintendent-i ashi.

Parnok ajak ya ozüngi memelaba mozü achiba ajanga HIV positive lir. HIV-positive puteter teimba ka mozü achirtem aser kasa syringe melentepa amshiba ajanga menatep, ta Nagaon district health department-i ashi.

Taoba ita tetsür 4 densema Civil Hospital nung nisung 88 dak HIV putet.



## TIR YIMYIM YIMOBILEM (EDITORIAL)

DIMAPUR AMUNGNÜ, MONGPUTENI(OCTOBER) 10, 2021

### Asenok tanüla jenjang asadanga

**A**lima nung asenok taküm mapatem aika nung asenoksasa asenok jenjang asadanga inyaker. Aji oda, asen temang nung azü jajaba jenjang, Blood Pressure aser sheni tashidak (sugar) ali-mali metettsü atema ondaka meshirangyonga mapang-mapang shia tendanger. Kaketshisatsü bushiba nunga asenok angazükba aser metetba jenjang metettsü atema tatidang agir aser mapang mapang shia kiojen akanga ali-mali tendanga anepalur. Iba kasaji asen tanüla jenjanga tendanga alitsü nungdaker. Tanüla jenjang tendanga tetezü asen taküm yimya aser libaliro nung Tsüngremi mulungba ama alir asü malir ta asensasa asen taküm jenjang bushia tashi itshiba mapa aser mapangtem asütsü. Ibayongji, lbri tapu 6 nung tenyar Paul-i asenok dang joko tain kuma Yisui sayuba mezüng teinyaktsütem indang dang jembia mekazüi tanüla nung tabensaba kuma aientsü merangtsüla ta tekong ka nung shia angur. Aji oda, asenok mezüng Khritan kümlü nungi taidok nangzükba, baptiba, teka agi nemeta sarasademtsüba, tasürtem shia aruba aser obendanga tesayubatem onük nung dang mapang endoka o entepa mekazüi asenokbo tanüla nung aser tamang nung tain akümstsü merangdi ta tenyar Paul-i asenok ama Yisu dak amangertem ajungshiba nungdak o ka yangi angur. Iba Lai tekong ya kodang bilemdandir, Paul-i akhidang lbri nungertem dang masü saka tanü asenok dang ashir ama angaloktsüsa asenok tanüla jenjang asenoki asadangtettsü. Asenok tamang jenjang asadanga ya arogo aser mungdang küm nung tain akümba agi masü, nütsüng aika asüba agia masü, tenla ki tajung ka yanglutetba agia masü mesüra tenla sen aika aruba agia masü saka asenoki Tsüngremi mulungba inyaksü jangraba ajanga asadangtettsü. Asenok tanüla jenjang asadangbaji asenok o Tsüngrem na tsüngda tesendaktep asadanga mapa ka asütsü. Aji oda, tanur asüdang tsürabur ashi manga tsürabur alidak nungi jenzüka aotsü merangba ama, asenok tamangerbo tamanger saka asenoki Tsüngremi ashi mangar, Pa anasa meliner saka timtem aser nungdak nung dang bushir ta süra asenok ano tanüla jenjangji lanu lir ta angatetdi. Iba ama taidok agütsüba, arogo akümba, tzüsenba, tasür shia aruba aser obendanga tesayubatem indang dang jembia melii, Tsüngrem den lia Tsüngrem ain aser taochi nung pei taküm mapa ajanga Yisu temeim kuli asüba mapa inyaker kuma tamang nung tabensaba kuma aientsüla ta tenyar Paul-i asenok ajungshir. Tanüla nung asenok koma tain akümer patekaji asenoki sarasademtsü jangratsü, kechiyong sarasadem ajanga dang asenok Tsüngrem anasai otet. Aji oda, tanüla nung tain aküm metetmeteta asenoki Tsüngrem temeim indang kuli sünütsü, asenoki taidok agütsütettsü, asenok dak tetsübu tanüla malitsü aser ajak den putepa litettsü. Tenyar Paul-isa 1 Korint 13 nung pa tamang nung lanu asüdangbo tanur ama pai bilem aser pai inyaker saka pa tanüla nung tain kümerbo tain ama bilema inyaker ta ashiba asenoki angur. Asenoka tamang nung tanur asüdang mangatet ama inyakerba aser jembibaji kecha masü saka teti tanur ama alitsübaji Tsüngremi mulungba masü. Yisua Pa sor tenla kidang putirtem den lia Pa shisatsü nung aser temang nung, Tsüngrem aser nisung matsüngdang taochi nung aien ta Luke 2:52 nung shia angur. Tetezü, Yisua pa arishi küm den külemi temang, shisatsü aser tanüla nung aien. Iba tashi jagi Pai tebu Tsüngrem temeim indang kuli asütsü tenzük, Pai teti sarasadem, Pai teti nübertem bushia oa temeim sayu aser Pai aremzük. Ibaji tanüla nung tamang aienba tamaltsü asütsü. Iba jagi tanüla jenjang asadanger. Iba kasaji, asenoka ajemajema meliteti tangar bushia oagi Yisu temeim indang kuli asüba, sarasadema aser aremzükba mapatem ajanga asensasa asen tanüla tamang jenjang asadangi

## OLEMSABANG

### CLEAN ELECTION NUNG AROGO ASER YIMTSÜNG PUTU MENDEN TEINYAKTSÜ

~ Mr. Among Jamir (Osang Zülur)

YSS May ita sensaksem "Clean Election nung takok asoshi Arogo aser Yimtsüng Putu Menden Teinyaktsü" onük nung amendaker May 28th 2021 anogo zoom ajanga tajangzük tulu ngua agioko. Iba sensaksem nung tongti jembirtem Rev. Dr. Noklen Longkümer, Pastor, Ungma Baptist Arogo aser Dr. Sünep Imchen, Chief AH & Veterinary Officer, Mokokchung liasü. Iba sensaksem ajanga tangazükbatem aser shisatsü tongtipang kar iba zülü ajanga lemsateper.

Clean Election nung takok asoshi Arogo Teinyaktsü: Rev. Dr. Noklen Longkümer - Alima yimsüsüba menden yangluba nung arogoi temerük aser ochi shisatsü agi tasü ita shilem agitsüla. Alima yimten yangluba nung arogoi shilem agiba ajanga nübur tanela jenjang indaktsür kechiaser arogo asoshi ibai tamajung tashitem anema tanela tongpang nung nokdakba lir. Election mapang ochimashi aser süpokrem agizüka pei temeden yoktepa ajanga asen nüburtem (arogopur) tiaji Esau-i chi- ausu kayong pei tambu senmang yoka achiba den saku lir. Atangji ibai arogo tamakok lir kechiaser item mapa inyakeritemji tangar masü arogo nung züngsem tajungtem temeja lir. Alima lenitsü asoshi lenir shimba nung, arogo teinyaktsü aser shilem:

1. Ali yimli tashi ajak Tsüngrem nungi aser yimsüsüba bangdak ya Tsüngremi latettsüba lir. Laishiba tesayuba nung amendaker, yimsüsür shiaji nübur ajungtsü atema mapa tajung inyaksü Tsüngrem tenzük ka lir ta arogoi ajungshitsü nungdaker (Rom 13:1-7). Tsüngrem tenzükertem ama yimsüsürtemi nübur ajungtsü asoshi inyaksü arogoi nendaka sayutsüla.
2. Teret maliba Political party olulu agi arogo manokshidaktsütsüla. Election mapang, ochi meyipsa temesüzükba o tanang jembiba, zülua prokshiba item nungi kümdanga alitsü tenungdaksü lir. Election temaka nüburtemi inyakba temenen mapatem süitema maor aser pei mapa yari temerenshi angutsü (J. Adok 21:8b) ta arogoi nüburtem dang ajang ajanga sayutsüla.
3. Election mapang sen tashi madak takok ngutettsü tesayuba nung arogoi shilem agitsüla. Süpokrem amshia pei jenjang yangluba, süpokrem agizüka pei temeden yoka achiba, anaprongla, küsa Tsüngrem aser nübur anema lir. Süpokrem temenen indang, Lai tasayuba ajanga pei juri temeden amshia ali yimli yangluba nung shilem agitsü tesayuba agütsütsü arogo shilem lir! (Anitet 23:8; Isa 1:23; Yob 15: 34).
4. Election mapang pei mulungjang kanga mita alitsü tesayuba. Tanü asen lima teraksa agi sünga aliba ya tangalen nungi mopungi oner aruba masü saka mulungjang mita maliba nungi atokbatem lir (A. Shin 4:23). Anungji, election anasa arudang, amangbapur ajaki pei mulungjang kanga nendaka mita litettsü asoshi arogoi tesayuba shisatsü agütsütsü tongtipang lir. Ballot-box tashi dang nungi Tsüngrem tashi tuluba aser political party ola dang nungibo Tsüngrem O dang-ang tashi angaba tamanger asütsü ajungshitsüla.
5. Vote agütsütetba tamanger asütsüsa arogoi inyaksüla. Shiba nem pei vote agütsütsü aji nija mulung aser nija temeten sota ayutsü, rakzüksü shinga daka tashi mali. Anungji, taruba polling anogo nungibo, Tsüngrem tsüngken tsübuba, nübur meimba, ochi aser teindang jakla akar nem ochishia pei temeden vote agütsütsü, tang nungi arogoi tanen makai sarasadema nübur nem tesayuba tejangja agütsütsüla.
6. Senso candidate inyakyim ya Tsüngrem mulungba masü ta arogoi nübur nem angatetdaksütsüla. Nisung shia nem pei mulungsentsü-i aginüa meimba shimtetsüsa teyanglur Tsüngremi yanglu aser kija shia nem Tsüngremi agütsüba temeten ya political party yimtsüng putu mendeni rakzüksü makok ta arogoi ajang-ajanga nokdaktsüla. Asen lima nüchi jenjangji, tanü aliba political party mesüra Naga political group shinga daka mali, saka tematiba Tsüngrem kabu nung dang - tesadang sovereignty (shared sovereignty) masü rangpen sovereignty (full sovereignty) lir. Item ochi kuli asoshi tanü arogoitem lungjemer "Clean election" inyakyim asoshi ajaki Tsüngrem dang sarasadema apusotsüla.

Asüng Nagaland tiaji clean election ajanga dang lemtettsü. Ochi aser temerük shisatsü agi ali yimli yimsüsüba nung shilem magitetra state ya samatsü. Anungji yimten lenir tajung arutsü ata-a alitsüba mapang masü saka lenir tajung bushiteta asen lima asoshi Tsüngrem nükjidong tulu atalokdaktsütsüsa state sorkar yanglutsü Arogoi tongti shilem agitsü mapang tongja tongago. T. Ken 33:12 nung, "Kin koba Tsüngremji Kibuba lir, tepelatsü; shir kin pa meyong asütsü shimtetogo." Tanü iba ochi o-ji asenoki agizüka amangdi süra asen lima dang Tsüngremi aochitsü. Aruya aliba election nungjibo ochi aser temerük shisatsü agi Kibuba dang pei mulungba ama ali yimli yangluba nung pei senti vote agütsütettsüsa yariang ta tamang agi sarasadema atatsü ayongzük. Vote ka jenjang - Ne senti vote ka agi asüng Nagaland tia lemtettsü.

Clean Election nung takok asoshi Yimtsüng Putu Menden Teinyaktsü: Dr. Sünep Imchen - Yimsüsüba mendenji Tsüngremi latettsüba menden lir. Yimtsüng putu menden nung telemtetba aser jembibatem ajanga jila balala nung alirtem tashi kongshir, ibayongji, parnok asoshi ajungshir temji shirnok aji kanga dang tongtipang lir. Moral responsibility ka makai kodang yimsüsüba menden nungji mendir, iba yimli aser yimsüsüba mendenji majungtsübasa. Anungji alima ajak nung yimsüsüba menden ajungaji moral order ka kübok lir aser aji pei yimsü tamang yari anishidaktsür. Asenok tamanger ka asü nungji iba moral order of governance-ji Tsüngrem nungi aruba aser aji Laishibai tejangja sayur. Anungji putu menden pangdak nung amenertem jagi itemji jangja meteta alitsü tongtipang.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazüngerü angateta agitsü mepishir**

## France nung Arogo lenirtemi tanur 330,000 dak tim mesüi inyak



October 5, 2021 nü France yimtiba, Paris nung Independant commission report sangdongba sentong nung Commission Tir, Jean-Marc Sauve (abelen)-i jembiba noksa nung angur. Kasa noksa nung Bishops' Conference of France (CEF) Tir, Eric de Moulins-Beaufort (ajichilen) aser Religious' Conference of France (CORREF) Tir, Sister Veronique Margron nata angur.

**Paris, October 09, 2021 (Agencies):** Tesüiba küm 70 tsüngda France nung Arogo lenirtemi tanur 330,000 dak shi nung azüaponga tim mesüi beshiogo, ta Mongobarnü (October 5, 2021) report ka ajanga metetdaksü.

Khristan putir 3,000 shi aser France Catholic Arogo nung tangartemi tanurtem dak tim mesüi beshi, ajisüaka Catholic lenirtemi asalentong junga yanglur küm aika ibaji mimshia liasü, ta Independent Commission nung tongti, Jean-Marc Sauvé-i metetdaksü.

Jean-March Sauvé-isa, Arogoi item ama mapa tamajung nokdangtsü atema kecha meinyakba dang masü saka aibelen mapatemji mangu ama toktsü, ta metetdaksü.

Takoksa angurtemi iba report ji pelaa agizükogo aser French bishops' conference tongti leniria parnok dang nungi tatok meshiogo.

France nung aliba Catholic Arogo aser tanga linük balala nung Catholic Arogotemi taaktsü mapaji jungkai adoktsü ta tsüba aliba mapang ka nung commission-i tapak 2,500 nung iba report ji agütsü.

Tanurtem dak tim mesüi beshirtem rongnung putirtem, Arogo lenirtem, Scout Leaders aser Camp Counselors densema liasü.

Takoksa angur tanur 330,000 nungji putir aser Arogo lenirtemi tim mesüi beshiba tanur 216,000 shi densema lir. Iba osang ya France nung National Institute of Health & Medical Research-i agiba study ka ajanga metetdaksü.

Arogo lenirtemi tim mesüi beshiba tanurtem rongnung shilem 80 shibo teburtem liasü.

France nung Arogoi azüapongba tsütsü tim mesüi beshiba tatalokba

jenti lir, ajisüaka item tatalokba anema ken o akatsü tasak, kechiyong itemji timbaka akhidang atalokba lir.

Takoksa angur telok- La Parole Libérée (The Liberated Word) nung tongti, Francois Devaux-i, "Iba ya puti otsü nung kanga tongtibang mapang ka lir. Küm aika ozüng alema inyakba mapatem mimshitsü atema melabaji onoki aitsür. Iba dang nungjagi tamajungbaji tai maket tanurtem ashiochtsüba lir," ta metetdaksü.

Commission-i Catholic Arogo dang takoksa angurtem nem teyari agüjang, ta metetdaksüogo.

"Takoksa angurtem dang Arogo sentsüh lir ta onoki züngshir," ta Sauvé-i ashi.

Item ken o ya küm ana dak tali bushisüngdanga aruogo. Commission-i küm ana ser tasadang shi takoksa angurtem dang nungi kuli angadanga aruba den külemi Arogo, court, police den jembia aru aser 1950s mapang nungi ataloka aruba osangtem osangkakettem nungi bendena aru.

France nung Conference of Bishops Tir, Eric de Moulins-Beaufort-i, iba report ngua putirtem kanga aoksar, ta metetdaksü.

"Iba anogo nung ni tatok meshir, nenok nisung shia dang tatok meshir," ta Eric-i ashi.

Versailles nung tongti putir, Luc Crepy-ia, tenla bendentsü aser independent commission ka tenteta Arogoi takoksa angurtem nem teyari agütsütsü atema maparen tenzükogo, ta metetdaksü.

Yaküm-a putir, Bernard Preynat-i tanurtem dak tim mesüi beshiba ajanga French Catholic Church kanga maaksür aliba mapang ka nung ano tang iba report sangdonger. Preynat-i tanurtem dak tim

mesüi beshiba atema pa aija küm 5 tepuokdak ayutsü obendang agüja liasü. Pai küm aika tsüngda tebur 75 dak tim mesüi beshiba pasasa nangzük.

Vatican otongdar, Matteo Bruni-ia, Pope Francis-ia iba report meteta mepelar, ta metetdaksü.

Mapang talangka nungi takoksa angurtem aser parnok atema ken o jembitsür advocate temi putirtem aser Arogo lenirtemi shi nung azüaponga tanurtem dak tim mesüi beshi aser tanga putirtemia pei santen mekümzükteni liasü, ta jembia aruogo.

2018 küm nunga taoba mapang Cardinal Theodore McCarrick-i tanurtem dak tim mesüi beshiba osang jungkai adoka liasü, iba sülen 2019 küm Pope Francis-i pa anendaksü.

Iba küm nungjisa Pope Francis-i Arogo dak sendakba ozüng tasen ka yanglua Catholic putirtem aser nun ajak dang tim mesüi inyakba mapatem osang metetdakjang, ta tuyua liasü.

Taküm June ita nung Pope Francis-i, Arogo nung inyakyim melenshitsü nungdaka liasü aser lenirtemi shi azü mazüokteti aibelenba mapatemji magizüktesü, ta metetdaksü.

Tesüiba küm aika Catholic putirtem aser Arogo lenirtemi shi azü mazüokteti aibelenba atema parnok aika anema ken o kaogo. 2019 küm nunga taoba mapang Cardinal George Pell-i Melbourne nung choir züngsem ana dak tim mesüi beshiba atema Australian court kati pa aija küm 6 tepuokdak ayutsü obendang agüja liasü.

George Pell ya taoba mapang Pope Francis indang finance minister inyakya liasü.

## ANO GO ABEN TSÜNGREM DEN

### MULUNGSO YA KWI?

*Atangji ni nenok dang shiti, ajak dang tali iba amitsüri inoktsüogo. Luk. 21:2.*

Alima yimya nung asadangba iba amai tuluba, timba, mujunga nemshia, moshia, alia..., aser itemji tajungba aser mulungso ta züngshir. Alishih tenük agi asadangba nung aji shitak asütsü. Envelop nung tenlatem koba temelemma mesüra taretba itemji mulungso tenla ta züngshir. Thanksgiving mapang shiri ak chanu ka mesüra an lamem ka mesüra asenjang din ter-metsü tenla agütsüdir itemji mulungso tenla rongnung züngoker. Saka, mersü tekabu ka, luli talang ka mesüra pengana auso ka itemjibo mejimenü tenla amai züngshir. Saka Kibuba nükdangbo asadangbaji alishih tenük agi anguba mesüra asadangba amai masü, Pai asadangbabo temulungjang nungi adokba tenlaji mulungso tenla ta agizüker.

Yisu mapang Yirusalem tenlaki nung takaitertemi jenti inoktsüba angu. Saka tezülen nungi amitsür sensaker kati lai inoktsüba poisa ana ola dena angashitsü akseta inoktsüba ngua Yisui ashi, item rongnung amitsür lai tenlabaji timba. Alima tsütsü nungibo aji tai asütsü akok, saka Yisu Khrista asoshibo aika ishika ji masü, saka temulung temerük, ochi, aser taittsüba meli agütsüba tenlaji timba. Atangji, aika agütsür Kibubai magizükba dang nungibo ishika süaka temulung temerük agi agütsübaji taoba. Anungji, mulungso ya kwi?

#### SARASADEM

O Kibuba, nai asadangba yimya meteta ni ne nem agütsütsü aser tenlatsü ni angazükogo. Amen.

## Allahabad High Court nung anti-conversion ozüng anema ken o angadangtsü

**Mongputeni/October 09, 2021:** Uttar Pradesh state nung Allahabad High Court-i state nung anti-conversion ozüng tasenba anema benokba ken o kar angadangtsü atema October 5 tashi anogo atsülanga liasü, ajisüaka kasa ozüng anema ano temepishiba ken o aika benokba ajanga ano maneni anogo atsülanga October 22 nü ang angadangtsü lemtetogo, ta International Christian Concern (ICC)-i metetdaksü.

Yaküm November 28 nü Uttar Pradesh State Cabinet-i Prohibition of Unlawful Conversion of Religion Ordinance draft agizüka liasü, iba sülen Uttar Pradesh State

Legislature-i iba bill ji agizüka India nung anti-conversion ozüng tasen rongnung ka aküm. Iba ozüng benokba sülen Uttar Pradesh tesem ajungalen Hindu yimsü alia amangertemi iba ozüng nung ajemdaker Khristan aser Muslim nungertem anema inyakya arudar.

Tesüiba ita ishika tsüngda Hindu yimsü alia amangertemi, Khristan lenirtemi Hindu nungertem mesüzüka Khristan yimsü dangi meyipdaksür, ta tai tongloktsüba ajanga nisung 100 dak tema puogo.

Linük temzüng nung ajemdaker anti-conversion ozüng anema temepishiba ken o kar benok aser item ken oji October 5 nü High Court-i

angadangtsü sentong liasü, ajisüaka kasa ozüng anema ano temepishiba ken o aika benokba ajanga Allahabad High Court-i iba ken o angadangtsü atema ano anogo atsülanga October 22 nü ang item ken o angadangtsü.

Anti-conversion ozüng anema ken o agütsürtemi ashiba agi, iba ozüng ya linük temzüng den meputep, kechiyong linük temzüng ajanga senso kati peii melungba yimsü agizüksü, beshitsü aser peii amangba yimsü proktsü atema temeden agüja lir.

Item temedenji India Temzüng Arrla 25 agi kümzüker.

"Nisung ka dang, ketdangsertem dang pai agiba telemtetba rasaa shiang aser temeden sayuang ta tuyubaji linük temzüng den meputep. Linük temzüng ajanga state tem tashi telatetka dang agütsür, saka state kati nisung kati agiba telemtetba rasaa shiang aser kuli agüjang ta ashibaji ajanga sensotem taküm aser temeden jenjang raksatsür," ta temepishiba ken o nung shia lir.

Tang India nung Odisha, Gujarat, Arunachal Pradesh, Chhattisgarh, Madhya Pradesh, Jharkhand, Himachal Pradesh aser Uttarakhand state nem nunga anti conversion ozüng benoka lir, aser item ozüng nung ajemdaker Khristantem aser Muslim nungertem tai tongloka amokmerener.





October 09, 2021 nü Rashtrapati Bhavan, New Delhi nung India Tir, Ram Nath Kovind aser pa kinüngtsü nati Denmark Ato kilonser, Mette Frederiksen aser la kinüngbu, Bo Tengberg na agizükba noksa nung angur.

## Tanü India aser China sepai ketdangsertem senden amentsü

**New Delhi, October 09 (Agencies):** Amongnü India aser China na nungi tongti sepaitem tsüngda tang agi 13benbuba senden amentsü, aser iba mapang nungji Ladakh kübok LAC nung mangatettep adoka aliba tesemtem nung ken o bentettsü atema jembitsü.

China tsütsülen Moldo nung anepdang 10:30 ako nungi tenzüka senden amentsü aser iba senden nungji Hot Springs nung tang aliba tensa atemaa jembitsü imlar, ta sepai ketdangsertemi metetdaksü.

Tawa China sepaitem PLA (People's Liberation Army)-i arrtsülen ambangyima inyakba sülen point aika nung tensa mejungi lia Amongnü senden amentsü.

Taoba hopta Arunachal Pradesh kübok Tawang sector

nung Yangtse anasa China aser India sepaitem tsüngda rara adoka liasü saka commander tem tsüngda jembiba sülen tensa süngjem.

China sepaitem 100 shi India nunger litsü telungi aitba nungi mangatettep adoka liasü.

August 30 nüa Uttarakhand nung Barahoti sector kübok LAC nung China sepai 100 shi arrtsü adena aitba ajanga rara adoktsüsa liasü saka sepaitemji tatsüka dang lirbo meyipa oadok.

Yaküm June 15 nü Galwan valley nung linük ana tsüngda sepaitem raraba sülen India aser China nati yimtenren tsütsü jembiba dang masü saka sepai tongti ketdangsertema senden amenba ajanga tensa süngjema liasü.

Ladakh region nung China-i sepaitem atema tejenokdak

yangluba den sepai aika yoka lir. Iba sülen India-ia kiojen yangluba den külemi sepai tali yoksemogo.

Taoba hopta Ladakh sendanga tensa asadanga mapang nung Army tongti, General M M Naravane-i, Ladakh nungi Arunachal Pradesh tashi nung LAC kilometer 3,488 nung PLA sepai tali yokba ya asenok atema tebilemtsü onük tuluka lir, ta metetdaksa liasü.

Taküm February ita nung India aser China sepaitem Pangong Tso-Kailash Range region nungi ainshi aser August ita nung Gogra anasa Patrolling Point-17A nungi ainshiogo, ajisüaka Patrolling Point-15, Demchok aser Depsang Plains nungbo tang tashi rara adoktsüsa lir.

## EAM Jaishankar-i linük asem semdangtsü

**New Delhi, October 09 (Agencies):** October 10 nungi tenzüka October 13 tashi nung External Affairs Minister, S Jaishankar-i Kyrgyzstan, Kazakhstan aser Armenia linüktem semdangtsü.

October 10-11 anogotem nung Jaishankar-i Kyrgyz Republic semdangtsü aser Hombarnü Kazakhstan-i aoba sülen October 12-13 anogotem nung Armenia semdangtsü, ta Ministry of External Affairs (MEA) sangdong ka ajanga metetdaksü.

Pai item linük semdangba mapang nung linük tsüngda tesendaktep reprangshitsü aser region nung tatalokbatem

lemsateptsü, ta MEA-i den senden amentsü.

Tang mezüng External Affairs Minister menden nung lia Jaishankar-i Kyrgyzstan semdangtsü. Pai Kyrgyzstan Foreign Minister, Ruslan Kazakbaev den senden amentsü aser Tir, Sadyr Japarov-a ajurutsü. Iba sülen linük ana tsüngda tezüngzüktep kar agitsü imlar.

October 11-12 anogotem nung Kazakhstan nung pa 6buba Conference of Interaction and Confidence Building Measures in Asia (CICA) senden nung adentsü. Jaishankar-isa Deputy Prime Minister aser Foreign Minister Mukhtar Tileuberdi na

CICA ya 1999 küm tenteta liasü aser iba telok nung tang züngsem linük 27, observer linük 9 aser observer organisations pongu lir.

India bo 1999 küm nungi CICA nung züngsem ka lir aser tang tashi yakyaka shilem agidar.

October 12-13 anogotem nung Jaishankar-i Armenia semdangtsü aser iba ya tang mezüng India External Affairs Minister-i Armenia semdang asütsü. Pai Armenia Foreign Minister, Ato kilonser aser National Assembly of Armenia nung Tir ajurua senden amentsü.



October 09, 2021 nü New Delhi nung Union Home Minister, Amit Shah'er ki anasa Indian Youth Congress züngsemtemi Union Minister Ajay Mishra'er jabaso, Ashish Mishra tanga puang ta takhangba agüja longkak aitdang tangokba noksa nung angur.

## Union Minister Ajay Mishra'er jabaso SIT matsüngdangi ao

**New Delhi, October 09 (Agencies):** Honibarnü Union Minister, Ajay Mishra'er jabaso, Ashish Mishra-i Lakhimpur Kheri tatalokba ken o bushisüngdanga telok special investigation team (SIT) matsüngdangi ogo.

Hokolbarnü police-i Ashish Mishra jaoka liasü saka pai mao, iba sülen Uttar Pradesh Police-i pa dang Honibarnü 11:00 ako tashi nung police matsüngdangi arutsü tuyua liasü.

Iba tatalokba ken o dak sendakba nung Brihostibarnü nisung ana apuba sülen police-i Ashish Mishra'er kima pa dang police matsüngdangi arung ta metetdaksa notice ka tokja liasü.

Taoba Amongnü aluyimertem longkak aitba mapang nung BJP

nung inyakerem mena aliba gari aseme aluyimertem dak tsükoktsü, iba sülen aluyimertemia tejashi nung nisung kar tepseta liasü. Iba tatalokba nung aluyimertem densema BJP nung inyaker ana, osangbener ka aser gari anir ka densema asü.

Aluyimertemi ashiba agi, gari asem rongnungji ka nungbo minister, Mishra'er jabaso Ashish Mishra densema liasü. Ajisüaka minister aser par jabaso natibo iba tesem nungji pa maliasü, ta ashir.

Minister aser par jabaso na anema benokba ken o bushisüngdangtsü atema DIG, Upendra Agarwal leniba nung züngsem 9-i akümba SIT team ka tenteta lir.

## SKM-i Centre sorkar nem takhangba onük pongu agütsür



October 09, 2021 nü New Delhi nung Samyukta Kisan Morcha (SKM) lenir, Yogendra Yadav aser aluyimertem lenirtemi osangbenertem den jembiba noksa nung angur.

**New Delhi, Mongputeni/October 09 (Agencies):** Tawa Lakhimpur Kheri nung rara adokba dak sendakba nung Honibarnü aluyimertem unions-i tentetba Samyukt Kisan Morcha (SKM)-i Centre sorkar nem takhangba onük pongu agütsüogo, aser item rongnung Union Minister of State for Home, Ajay Mishra anentsü aser par jabaso, Ashish Mishra tangsa aputsü densema lir.

New Delhi nung osangbenertem senden ka nung jembidang SKM-isa Lakhimpur Kheri nung asür aluyimertem atema temeja sentong ka agitsü, Rail Roko Andolan agitsü, Shaheed Kisan yatra agitsü, Dussehra benjung mapang BJP lenirtem noksa rongdoktsü aser Kisan mahapanchayat ka ayongzüka agitsü metetdaksü.

Uttar Pradesh kübok Lakhimpur Kheri nung rara adokba atema jashiba metetdaksa aluyimertemi sentong pongu renema agitsü lemtetogo.

SKM-i, "Onoki Uttar Pradesh nung aluyimertem aser linük tesem ajungalen aluyimer asürtem nem akhüm agüja October 12 nü Lakhimpur Kheri district kübok Tikonia yimdak sarasadem sentong nung shilem agitsü ayongzüker," ta metetdaksü.

"October 12 nü gurudwara, tekülem ki, mosque aser Tenla kitem nung asür aluyimertem nem akhüm agüja sarasadem sentong ayongzüka agitsü atema aluyimertem organizations ajak dang mepishir," ta SKM-i metetdaksü.

"Kasa aonungjisa Candle march agidaksüner. Onoki linük nung senso tajung ajak dang asür aluyimer pongu nem akhüm agüja October 12 aonung pei kima candle pongu tsükloktsü mepishir," ta parnokisa metetdaksü.

October 11 tashi nung item takhangba magizükra onoki linük tesem ajungalen longkak sashia aittsü, ta SKM-i metetdaksü.

Aluyimertemisa Lakhimpur Kheri nungi 'Shaheed Kisan' yatra agitsü aser asür aluyimertem mitsüji UP nung district ajak aser state ajaki bener aotsü.

October 15 nü Dussehra benjungnü Ato kilonser, Narendra Modi, Union Home Minister Amit Shah aser BJP lenirtem noksa rongdoktsü. October 18 nü linük tesem ajungalen 'Rail Roko Andolan' ayongzüka anepdang 10:00 ako nungi nikongdang 4:00 ako tashi train lenmang mokdangtsü aser October 26 nü Lucknow nung 'Kisan mahapanchayat' agitsü.

# Islamic State azüoktsü atema US den minyaktsü: Taliban Taoba Iran tir Abolhassan Banisadr süogo



**Islamaabad, Mongputeni/October 9 (Agencies):** Afghanistan nung extremist teloktem azüoktsü atema US den minyaktsü ta Taliban-i Honibarnü shiogo. August ita America nunger sepaitemi Afghanistan toktsür aoba sülen linük ana tsüngda tang mezüngbuba sensak asemtsü lia Taliban-i parnok tenokdakdak jangjatsüogo, koba onüktem rongnung tongtibangtiba ka lir.

Taliban aser US ketdangsertem Qatar yimtiba Doha nung Honibar aser Deobarnü nü senden amentsü. Linük anaprongla nungi ketdangsürtemi senden nung sensak asemtsü aliba onüktem rongnung extremist teloktem azüoktsü aser Afghanistan nungi Afghan nunger aser bendangertem anintsü densema lir. Nüburtem aninba sentong nung Taliban-i tashiyim mamshi arudar.

Taliban political otongdar Suhail Shaheen-i Associated Press dang ashiba agi, Afghanistan nung amenoka aliba Islamic State teloktem azüoktsü atema Washington den teka amteper minyaktsü. IS puri tawa tesem aika nung lengdong bener arutsüba nangzüka arudar, kong mosque ka nung Shiite Muslims nunger 46 tepsetba den tekülemer aika yirutsüba densema lir. "Onok kijai Daesh azüoktetsü," ta Shaheen-i ashi. Islamic State teloktem azüoktsü atema

Taliban-i US den teka amteper minyaktsü asü ta asüngdangba mapang pai iba telangzüba agüja liasü.

2014 küm Afghanistan anütoklen poktetba sülen IS pur Shiite Muslims tem tanen makai maka arudar. Kasa mapang IS ya US asoshia lendong tulutiba lir.

August ita tatemlen US sepaitemi Afghanistan toktsüba sülen linük ana tanga mezüngbuba ajuruteper. US-i iba sensaksem ya parnok agizükba temaitsü ka masü ta shiogo.

US deputy secretary of state Wendy Sherman aser Pakistan nunger ketdangsürtem Islamabad nung anogo ana senden amenba sülen tang Doha nung iba senden mender. Islamaba nung sensaksem ya Afghanistan dak rangloker agi. Pakistan nunger ketdangsürtemi US dang Afghanistan nung yimsüsür tasen den tesendaktep ayutsü aser rongsenketsüng kanga mejungi küma oya aliba mesemtsü atema international fund tem salatsütsü mepeshia asüngdangogo.

Maneni Pakistan-i Afghanistan danga lokti ajak den tesendaktep ayutsü aser human rights aser lokti nung nütsüng agi ajema aliba kin aser tamangba yimsü loktitem anepalutsü metetdaksüogo.

Hokolbarnü mosque ka amakba sülen Afghanistan nung Shiite clerics temi Taliban yimsüsürtem dang tekülemdak

kümzüka toktsütsü mepeshia metetdaksüogo. Iba lendong bener arutsüba ya IS puri nangzükogo aser bomb pokdaksüsang ya Uygher Muslim nunger ka ta jangjatsüogo.

IS puri ashiba agi, parnoki Shiites aser Taliban naprongladak rangloker iba bomb pokdaksü. China-i ahangba peridaksütsü atema Taliban-i Uyghers nunger mintoktsü mulunga agizükba atema parnoki iba mapa inyak.

US-based Wilson Center nung Asia Program deputy director Michael Kugelman-i ashiba agi, Hokolbarnü tatalokba dak ajemdaker ano azütokshi aika ajangshia aotsü. Uyghur telungpurtem ya timba East Turkestan Islamic Movement nungi lir, shirok Pakistan aser Afghanistan arrtsü nung amenoka lir.

Afghanistan aser Pakistan naprongla China indang multi-billion Belt and Road initiative project ajanga ajangzüktsü imlaa atatepdar. Iba lenmang ajanga Beijing aser Central aser South Asia sendakteptsü. Iba tajangzük agitsü atema parnoki China nung Uyghur Muslim nunger rishikangshia amshiba mashishir. Taliban otongdar Zabihullah Mujahid-i taoba hopta China nunger indang project ya iba tesem temeket nung alirtem atema rongsenketsüng nung ajak dang tongtibangtiba inyakym ka ta shiogo.

**Paris, Mongputeni/October 9 (Agencies):** 1979 küm Islamic revolution sülen Iran indang mezüngbuba tir akümsang Abolhassan Bani-Sadr Honibarnü arishi küm 88buba nung süogo. Pa France nung oa jenoka liasü. Pa mapang talangka shiranga liyar Paris kübok Pitie-Salpetriere hospital nung asü, ta pa kinungtsü aser chirnurtemi Bani-Sadr indang official website nung metetdaksü.

Bani-Sadr ya Islamic clergy tem teyari nung 1980 küm January ita Iran indang mezüngbuba tir aküm. Ajisüaka radical clerics tem den tashi atema toktepa sülen pa taruba kümbo France-i jena oadok aser pa taküm tepeyong idakji ali.

Pa asüba osang sangdongba mapang Bani-Sadr'er kinungertemi, tamangba yimsü tenüng amer linük arakmoka yimsü asüba mapang pai nüjiso atema nokdak, ta ashi. Par kinungertemi pa Versailles nung remdaksünü, kong pa taküm tepeyong liogo, ta pa indang assistant Paknejad Jamaledin-i Reuters dang



Abolhassan Banisadr (File photo)

telephone ajanga ashi.

2019 küm Reuters den sensaksemba mapang taoba tir yagi, 1979 küm takok anguba sülen Ayatollah Ruhollah Khomeini-i revolution tamendakdak ashioxtsü, ta ashiba den iba ajanga takok nung pa den Tehran-i meyipa aoertem kanga mepeladaksü, ta ashi.

Bani-Sadr-isa, küm 40 tejakdang Paris nung pai tamangba yimsü lenirtemi aniba revolution ajanga Shah yimsüsüba sülen democracy aser human rights atema lenmang sadema lapoktsütsü ta imlaa liasüba lemsatpep.

## DR Congo nung rong ka mekup; nisung aika asü



**Kinshasa, Mongputeni/October 9 (Agencies):** Congo ayong nung rong ka mekupokba sülen nisung 100 dak tema sür mesera samara alitsü ta bilemer, ta Democratic Republic of Congo provincial authorities-i Honibarnü ashi.

Hokolbarnü tashi nung tasümgang 51 ngutetogo aser ano nisung 69 samar alitsü ta bilemer, ta Mongala province indang Angh otongdar Nestor Magbado-i AFP dang ashi.

Paisa iba lendong nung densema alir nisung 39 kümzükogo. Rong nung mena alirtem indang osang tejangja memetetba ajanga nisung kwi sama aji osang tejangja memetet aser rong indang capacity dang apir nisung 69 samar alitsü ta bilemer, ta paisa ashi.

Iba rong ya süng agi yangluba rong teku mesüteper aliba ka liasü, koba dang pirogues ta ajar, ta Magbado-i

ashi.

Paisa, rong nung nisung talila amenba den aonung tsümgang majungba ajanga iba lendong atalok asütsü akok, ta ashi.

Iba tatalokba indang osang ya mejangjai liasü saka Hokolbar aonung media-i metetdaksüba aser provincial ketdangsürtemi Honibarnü jangjashitsüba sülen ang jangjaa aküm.

Maneni Magbado-i, Mongala ketdantsürtemi rong angemoka yili iba osang Kinshasa nem agütsüogo, ajisüaka asürtem osang jangjatsü atema ataa liasü, ta ashi.

Lendong nung densema alirtem kümzüktsü atema maneni inyaktepdar saka teimla samaa odar, ta pai ashi.

Provincial authorities-i Hombarnü nungi tenzüka asütem atema anogo asem mang ayimtsü sangdongogo.



Pakistan Foreign Minister Shah Mahmood Qureshi aser US Deputy Secretary of State Wendy Sherman na Foreign Office nung sensaksemogo. Afghanistan nung Taliban dak sendakba nung mepetmesü adokaka kiralongrar azüoktsü atema Washington-i maneni Pakistan den sendaktepa inyaktsü, ta Sherman-i ashi.

# FOCUS-Nagaland-i senden ka ayonga agiogo



**Dimapur, Mongputeni/ October 09, 2021 (TYO):** Honibarnü, FOCUS-Nagaland (Foster Climate Resilient Farming Systems in the North East -Nagaland) aser CIP (International Potato Centre) ketdangsürtemi CIP, PUSA, New Delhi indang office nung senden ka ayonga agiogo, ta sangdong ajanga metetdaksü.

Iba senden nung, FOCUS-Nagaland indang APC & MD Y. Kikheto Sema IAS-i, akhi tetsü tebou mapang inyaka aruba yimyatem nung anidaka alu ayimba ya rongsenketzüng tsütsü tajangzük lir saka tarutsü asoshi iba ya tebilemtsü. Ibayongji state sorkari business enterprise ka ama sustainable farming tsütsü terenlok lidaktsütsü asoshi inyaker, ta metetdaksü.

Linük nung alushi tululu aliba tanga tesemtem den medemdangra, Northeast nung State ajunga aser Nagaland nung tsüngküm mongpu balala den apet tsünüsembongtsü

yoktsü atema ali temo aketba tesem peria lir aser mongpu asempronlga nung alo (potato) tsünütsü tajangzük asütsü aser ibaji ajanga aluyimertemi inyakba nung timba bendenloka inyaktü asoshi maongka agütsütsü, ta paisa ashi.

CIP (Asia) indang Regional Director, Dr Somarendu Mohanty-i, FOCUS team dang pelaba metetdaksü aser pai iba project indang nukjidongtem team dang metetdaksü, kong Nagaland State nung alo metsühjang adokdaksütsüsa inyakyim tenzüksütsü aser mapang tetemjen nung aluyimertem nem jenjang dalang agi alo metsühjang tajung agütsütsü sentong lir.

Dr Somarendu-i, jenjang dalang agi agütsüba metsühjang aser iba nungi timba züsentetba ajanga State nung aluyimer atema alo tsünüba tsütsü tajangzük timba ngudaktsütsü aser iba wadang tuluba kümtsütsü. Decentralized low-cost seed production

technology talisa 'rooted apical cutting' inyakyim timba kuma inyaka aser tenzüksü nungang iba mapatong ajangzükttetsü, ta metetdaksü.

FOCUS project ajanga iba project asoshi senotsü teyari agütsütsü imlar aser iba mapang CIP-i technical partner ama inyaktü, ta pai ashi.

Iba project dak sendakba nung tesemtem semdanga aser sensaksemtsü asoshi CIP team-i State yakta semdangtsü imlar. IFAD agizükba sülen taküm küm tatemlen, iba project atema Nagaland sorkar den MoU ka sign asütsü imlar.

Maneni, FOCUS project tsüngda sub project ka ama Nagaland nung aluyimertem inyakyim tajungba melenshia inyaktü atema Low-Cost Potato Seed Production System ka yanglutsütsü nukjidong nung project ka tenzüksütsü asoshi sensaksemtsü tebilemba nung iba senden agia liasü, ta kasa sangdong nung shia lir.

# Noklak Deputy Commissioner ajanga metetdaksür

**Noklak, Mongputeni/ October 09, 2021 (TYO):** Deputy Commissioner Noklak, Hiazu Meru-i sangdong ka nung, District Planning and Development

Board, Noklak indang züngsem ajak dang, October 2021 atema DPDB senden ya aruya aliba Mongolbar (12.10.2021) anepdang 11:00 meta DC's Conference Hall,

Noklak nung agitsü, ta metetdaksü.

Anungji, iba senden nung DPDB züngsem ajak medema aruagi adentsü asoshi tetuyuba agütsür, ta DC-isa ashi.

# Ayushmann-i 'Action Hero' nung shilem agitsü

**New Delhi, Mongputeni/ October 09, 2021 (Agencies):** Taruba film 'Action Hero', koba Anirudh Iyer-i direct asütsü, iba film nung Ayushmann Khurrana-i tongti shilem agitsü terenemba lir.

Iba project dak sendakba nung, Ayushmann-i, "Aanand sir den tasembenbuba longjemtsü maongka anguba atema pelar aser 'Action Hero' ajanga alima tesem ajunga nung audience tem maneni atsüa arutsü imlar," ta ashi.

"Action Hero indang script ngua iba Project nung adentsü jangradok. Iba script atongtepba yimya balaka lir aser kanga junga zülüogo," ta pai shisem.

Kasa mapang, Ayushmann-i aruya aliba film indang teaser ka lemsatepa liasü. "#ActionHero nung @Aanandrai aser #BhushanKumar! na den tanaben longjemtsü maongka anguba asoshi pelaseter. Iba Project ya tanga dang nungi balaka lir," ta pai ashi.

Anirudh Iyer-i direct asütsü aliba 'Action Hero' ya T-Series aser Colour Yellow

Production project ka asütsü aser Aanand L Rai-i iba film atema producer ama inyaktü. Aanand den Bhushan Kumar aser Krishan Kumar nati iba project yanglutsü.

T-Series indang tekolak, Bhushan Kumar-i, iba film - Action Hero atema Ayushmann ya actor tetemjen," ta ashi.

Producer Aanand L Rai-i, "onoki iba ama genre nung kodanga inyakdanga mali aser iba project mezüng asütsü. Iba project atema, onoki Ayushmann den tasembenbuba longjemtsü sentong lir. Taoba project nunga pa den jangratema inyakogo aser pa den film tasen tangok tenzüksü asoshi yongyaseter," ta ashi.

Ayushmann indang project tasenba ya India aser UK nung tangoktsü.

Iba film dak alaka, Ayushmann Khurrana indang 'Chandigarh Kare Aashiqui' film ya December 10, 2021 nü theatre nung sayatsü terenemba lir. Kapoor-i direct asüba film nung Ayushmann-i cross-functional athlete ka ama shilem agiba angutsü.

OFFICE OF THE  
MERANGKONG SENSO TELONGJEM DIMAPUR  
TENÜNGSANG AGÜTSÜR



Mr. Limtisu Yaden aser Mrs. Narola tena jabaso **Mr. Moalong Yaden**, World Bodybuilding and Physique Sports Championship Tashkent, Uzbekistan nung 5th Position ngua tenüngsang tulu bener arutsü nung, Merangkong Senso Telongjem Dimapur-i Tenüngsang tetushi tulu agütsür.

Tarutsü nunga pai inyakba wadang ajak nung takok ngudakjang tatarasademtsür.

Sd/-  
**TAONGNUKSHI IMSONG**  
Tir, MSTD

Sd/-  
**WATITOSHI LKR**  
Tongti Zülur, MSTD

10<sup>TH</sup> OCTOBER 2021

**WORLD MENTAL HEALTH DAY**



OMEN  
"TEBENDANG ALIBA  
LIMA KA NUNG  
TEKOLOK ANEMA ALIBA"

**MEKETMESENI TEKOLOK ANEMA AYÜTSÜ INDANG JEMBIDI.  
BENSHIBA TEKOLOK ANEMA ALIBAJI TEMANG ANEMA ALIBA  
ANENANG INDANG TONGTIBANG SHILEM KA.**

**AGIZÜKANG / NUNGITTANG / RIZÜNGANG**

- \* Nüburtem teyari bushitsü atema tesendaktep tajung yanglutsü nungitdi.
- \* Tekolok nung timtem alirtem Health Services angutsü temsüa lir.
- \* Alima ajunga asungba COVID-19 wara ajanga Tekolok Anema ayuba tsütsü timtem balala adokdaksüogo aser aikadak iba timtem tamajungba kümdaktsüogo.
- \* Tekolok Anema aliba nung item ya dena lir - Asenoki koma bilemer aser tangar dang asen jakla/yimya sayuba; TAKÜM nung asenoki koda achaayanger aser Asenoki asen sasa asenji koma bilemer
- \* Tekolok Anema ayutsü atema Tebandang mekai aser Ajaki agitetba Services nung nungitta aser rizüngdi.

**ASENOKI INYAKTSÜ NÜNGDAKER & TANGSA INYAKTSÜLA!!**

For more information contact  
**District Mental Health Program, District Hospital**  
Dial Toll free no | **1800-345-0019** for any queries on **COVID-19**  
as well as for any **MENTAL HEALTH ISSUES**

**TETI  
TEKÜMDANGTSÜ  
MERATEM  
NUNG  
ANIDAKANG**

  
WEAR MASK

  
STAY HOME

  
SOCIAL DISTANCE

  
WASH HANDS



# Minister Dikho-i 21buba NSF MM Trophy tenzüksüogo



Honibarnü, Indira Gandhi Stadium Kohima nung Manipur PHED Minister L Dikho-i 21buba Naga Students' Federation (NSF) martyrs memorial (football) trophy asayamung tenzüksü noksang angur.

**Kohima, Mongputeni/October 09, 2021 (TYO):** Honibarnü, Indira Gandhi Stadium Kohima nung Manipur PHED Minister L Dikho-i 21buba Naga Students' Federation (NSF) martyrs memorial (football) trophy asayamung tenzüksü liasü, ta sangdong ajanga metetdaksü. Angami Students' Union (ASU) ajanga ayongzüksüba football asayamung nung, Manipur nungi team ana densema team 52 agi shilem agidar.

Iba asayamung nung takok angur team nem senpet lakh 2 aser runner-up nem senpet lakh 1.20 agütsütsü renema lir. Semi final nung tamakok angur team anaprongla nem senpet 30,000 (30,000 each) aser quarter-final nung tamakok angur team nem senpet 15,000 agütsütsü. Iba dak alia, highest scorer, best custodian, best defender aser best mid-fielder nem individual prize - senpet 10,000 agütsütsü; aser 'player of the tournament' nem award tajung agütsütsü renema lir.

Honibarnü, iba asayamung tenzüksü Phesama Youth Organization aser New Market XI na asaya liasü. PYO-i New Market XI madak goal 5-3 agi takok angur. Iba match masayadang, asayamung lapokba sentong nung, Minister L Dikho-i, telongjem aser yimji-yimjung sayua iba asayamung ayongba atema NSF aser ASU dang pelaba metetdaksü. Pai ashiba agi, saisapong ya asen sobaliba ka asünung, Naga nunger dak iba sempet

balaka moaja lir. Tawa tanü saisapong ya industry tuluka lir aser iba wadang nung lanurtemi maongka agütsüla. Dikho, shibai 1989 küm Nagaland team nungi shilem agia Subroto Cup takok angur aser Government High School Nagarjan nung kaketshir ka liasü, küm 29 sülen Dimapur nung iba school aser sports academy jenjang ngua pai sasaseta bilemba lemsatop. Linük nung Manipur ya saisapong tesem tongtibang ka ama ajaki züngshir, anungi

saisapong ya profession ka ama agütsü asoshi Naga nungeri parnok (Manipur) dang nungi angazüksüla, ta pai ashi. Manipur nungi National, International aser Olympics densema jenjang balala nung saisponger tajungtem adokogo, ta pai ashi. Kasa sentong nung, Organising Committee indang Convenor, Dievi Yano aser ASU president Bisevi Nakhro nati o jembu. ASU games & sports secretary Thejhoukho Thomas Khawakhrie-i shilem agir team tem tenangzüksütep agiba achayanga liasü. Thejasenuo Kire aser Nourhengunuo Zatsu nati ken ka aten; aser Thejakhrienuo Pienyü-i 'Waka Waka' ken ajanga telok saksalemdaksü. Iba sentong nung, ASU tribunal, Neizokhotuo Belho menden liasü aser sentong tenzüksü Meriema Baptist Church, Pastor, Rev. Keduolhoulie Shüya-i sarasadem.

## ISSF Junior World Championship: India team-i medal timba angu



India team nungi Nischal, Ayushi Podder aser Prasiddhi Mahant nungertemi Junior's Women's 50mm Rifle nung silver medal takok anguba noksang angur.

**Lima, Mongputeni/October 09, 2021 (Agencies):** ISSF Shooting Junior World Championship nung, India team-i gold medal 13buba ngua asayamung tembangogo. Hokolbarnü, tebur team 25m Rapid Fire Pistol tetoktepba nung, Vijayveer Sidhu, Anish aser Adarsh Singh nungeri India atema gold medal 13buba bendenlokja liasü. Tebur team 25m Rapid Fire Pistol final asaya nung, India team-i Germany nunger Fabian Otto, Felix Luca Hollfoth aser Tobias Gsoell (2) nunger ajateta asayatsü asoshi, par asempronglai point 10 shi angu. Junior double trap tetoktepba nung, India tsür Manvi Soni (105)-i külem India tsür Yeshaya Hafiz Contractor (90) ajateta asayar sülen, lai gold medal angu. Iba tetoktepba nungsa India tsür Hitasha (76)-i bronze medal ngua liasü. Tebur double trap tetoktepba nung, Vinay Pratap Singh Chandrawat-i point 120 shi tongteta gold medal angu. Sehajpreet Singh (114)-i silver aser Mayank Shokeen (111)-i bronze medal nguogo.

50m rifle 3 positions mixed team asayamung nung, Ayushi Podder aser Aishwary Pratap Singh Tomar nati silver medal ngua liasü. Iba gold medal (50m rifle 3 positions mixed team) tetoktepba nung, Germany nunger temeyoktep tarep Max Braun aser Anna Janssen (31) na tesülen tanabuba jenjang nung tembangtsü asoshi Ayushi aser Aishwary nati point 17 ngutet. Qualification round nung, India nunger Ayushi aser Aishwary nati otsüsütsüsa point 590 ngutet aser final nung tenati tanabuba jenjang ajangzüksüktet. Kasa qualification round nung, külem India team Nischal aser Sartaj Singh Tiwana nati point 574 ngua jenjang 8buba nung tembang. 25m rapid fire pistol mixed team nung India nunger Rhythm Sangwan aser Vijayveer Sidhu nati gold medal anguba sülen, iba qualification asaya liasü. Medal tally nung, India indang gold medal 10buba bendenloktsütsü atema, Sangwan aser Sidhu nati Thai-

land nunger Kanyakorn Hirunphoem aser Schwakon Triniphakorn madak 9-1 agi takok angu. 25m rapid fire pistol mixed team nungsa, India nunger Tejaswani aser Anish nati bronze medal ngua liasü. Iba asaya nung tenati 10-8 agi Thailand nunger Chawisa Paduka aser Ram Khamhaeng tsüksükdaksü. Maneni, junior women's 50m Rifle 3 Positions nung India tsür Prasiddhi Mahant, Nischal aser Ayushi Podder nungeri America tsür Elizabeth McGhin, Lorraine Zaun aser Carolynn Tucker makokba sülen, parnoki silver medal nguogo. Gold medal asaya tetoktepba nung India team-i 43-47 agi America tsür team makok. India team-i gold medal 13, silver medal 11 aser bronze medal 6 densema medal 30 nguogo. Parnoki medal tally nung temaba jenjang tongteta tembang. USA team-i gold 6, silver 8 aser bronze 6 ngua tanabuba jenjang nung tembangogo.

## 2021 Ballon d'Or nominee rongnung Messi aser CR7 dena lir

**Mongputeni/October 09, 2021 (Agencies):** Taküm tebur indang Ballon d'Or award 2021 atema football asayar (tebur) 30 shortlist rongnung Lionel Messi, Cristiano Ronaldo, Neymar Jr, Jorginho aser N'Golo Kante nunger denogo. France Football ajanga agütsüba sempet (Ballon d'Or award) atema tetokteper rongnung item asayar tejakdang ser lir. Ballon d'Or award 2021 atema nomination nung adener rongnung football superstar Erling Haaland, Kylian Mbappe, Karim Benzema aser Romelu Lukaku nunger asütsü. Ballon d'Or award trokben takok angur Messi aser Megan Rapinoe nati 2019 küm iba award agizükogo. Taoba küm Covid-19 tensa kanga mejungi akümba yong, Ballon d'Or sentong thinena liasü. Football nung kijai ajangzüksüba nungtugu award rongnung Ballon d'Or ya asütsü aser 1956 küm British nunger Stanley Matthews-i iba award mezüing agizüksü liasü. November 29, 2021 nü Paris nung iba Ballon d'Or sentong agütsü, ta sentong tayonger, France Football magazine ajanga osang jangjatsüogo. Chelsea nungi asayar pungo tashi 2021 Ballon d'Or list nung dena lir. Kasa list

- Harry Kane-a nominate süa lir.
- \* **Ballon d'Or award 2021 nominee tem yamai alütsü:**
- Cesar Azpilicueta (Chelsea, Spain)
- Nicolò Barella (Inter Milan, Italy)
- Karim Benzema (Real Madrid, France)
- Leonardo Bonucci (Juventus, Italy)
- Kevin de Bruyne (Manchester City, Belgium)
- Giorgio Chiellini (Juventus, Italy)
- Ruben Dias (Manchester City, Portugal)
- Gianluigi Donnarumma (PSG, Italy)
- Bruno Fernandes (Manchester United, Portugal)
- Phil Foden (Manchester City, England)
- Erling Braut Haaland (Borussia Dortmund, Norway)
- Jorginho (Chelsea, Italy)
- Harry Kane (Tottenham, England)
- N'Golo Kante (Chelsea, France)
- Simon Kjær (AC Milan, Denmark)
- Robert Lewandowski (Bayern Munich, Poland)
- Romelu Lukaku (Chelsea, Belgium)
- Riyad Mahrez (Manchester City, Algeria)
- Lautaro Martinez (Inter Milan, Argentina)
- Kylian Mbappe (PSG, France)
- Lionel Messi (PSG, Argentina)
- Luka Modric (Real Madrid, Croatia)
- Gerard Moreno (Villarreal, Spain)
- Mason Mount (Chelsea, England)
- Neymar (PSG, Brazil)
- Pedri (Barcelona, Spain)
- Cristiano Ronaldo (Manchester United, Portugal)
- Mohamed Salah (Liverpool, Egypt)
- Raheem Sterling (Manchester City, England)
- Luis Suarez (Atletico Madrid, Uruguay)

**BILEMDANGANG**  
"Tsüngremi moatsüba nungi Paisa tenla asüngdangar."